

Buna sira, stè ben, cari siùri,  
da 'n bel pès, a Nadàl s'ancuntrùma  
tùcc ansèma, csì chì, e parlùma  
del facèndi ch'ùj càpita 'n gir.

L'an pasà, dop Curs Cento Canòni,  
j'áva vist 'na muntàgna 'd macèrji  
e 'l persòn-ni a uardè, tûti sèrji  
i rutàm ad cul gram Brusalèn.

A j'ho pià 'n gron stramlòn, ans ra prùma  
j'ho pensà: l'è pasà i terurista,  
ch'j rivàvu sicûr d'ant ra Pista,  
pò j'andàvu a piè u trènu 'ns stasiòn.

Tòntu pû che, ausònda ra tèsta,  
j'ho pû vist cula gron paserèla  
che co u temp l'era semper pi bela (o no?)  
ma che tùcc j'ùma vist, e da semp.

Per savèj cmè ch'j stàvu j afàri,  
j'ho ciamà an vegiòt ch'el uardàva,  
e u m'ha dicc tût la rava e la fava:  
l'era 'n vegg pensiunà 'd Bursalèn.

Dìs che j'avu da fè 'n gron mercàto  
jên 'd cùj "super" che basta ch'j vèndu  
e i cliènt, basta 'n màche ch'j spèndu  
tont ch'el paga l'è semp Pantalòn.

Poi, pi 'n là, dop a l'oltre canàle,  
j'hon tràcc sù ogni afè, csì la drèra  
e 'nche sè cula gron ciminièra  
j'hon facc prestu a sbarsila 'nche lè.

E j farròn, ma pi 'n sà, 'na gron scòla  
'ndò ch'u j'era l'ingrès, pû o mènu,  
a l'è 'n pès ch'j na pàrlu, ma j tènu  
ogni tont a parlè 'nche 'd sulè.

E pi 'n là, dop a Piàsa Mentàna,  
sûbit dop al Cantòn, pû o mènu,

'ndò ch'ùj pàsa di e nocc tûcc cùj trènu  
j'hon cmensà finalment a scavè.

J farròn giúst in gron sotopasso,  
pr'u doj mila l'è pront, a sperùma,  
e 'nche noi s'aj sarrùma, a vigrùma  
dàj e dàj sè ch'j avròn cumbinà.

Per adès j'hon trovà di gron tûbu,  
csi là suta l'è tût in groviglio,  
l'è pen 'd tûbu, u j'è 'n gron spariglio  
bsò 'ndè piòn: j'è da rompi e rangè.

Rompi i tûbu, l'è nenta csi fàcil,  
certa gent, pò, j fon semp 'na fadèja  
jèn el va, jèn el ven, jèn el pèja,  
e j travàj j son semper da fè.

E ùj sarrèis da parlè d'j ambulànti  
che da semper j pàgu 'na tàsa  
per pudèj travajè 'nt ina piàsa  
ch'a l'è 'ndonda ch'j fon el mercà.

J pretèndu 'n mà 'd fè u sò cumèrciu  
tût u di a mustrè 'l sò rubèti,  
s'l'è d'inver a batènda 'l bruchèti,  
s'l'è d'istà fòndsi aria 'ns u nas.

Cùj chj cmòndu j'aurjisu spustèji  
o 'nt er viàl, o 'nt ra piàsa Savòn-na,  
isa pò l'è l'idèa pì bon-na:  
tût cul màchini, pò, 'ndò ch'j vòn?

An cà mèja l'è semp in problèma  
cumbinè pr'el mangè e pr'el bèjvi:  
ant ra mnèstra 'n pò 'd sà e 'n pò 'd pejvi  
cùca vòta la pò 'nche 'ndè ben.

Ma per bèjvi l'è propi 'na gron-na  
perchè l'acqua urmaj l'è 'nquinàja  
e l'è grama, o s-ceta o rmisciàja  
con el ven o 'nche sè con l'asì.

Ma 'nt el ven j'hon trovà 'l metanòlo  
e j'hon dicc che con isa sustònsa  
a l'è 'n ven che rivà pò 'nt ra pònsa  
a l'antòsica cùj ch'j l'hon buì.

J'ùma avì gli elesiòn n'atra vota  
con el PSI e con Craxi e Martelli  
tùcc ansèma, da bravi fratelli  
j'hon dicis ad fèm turna vutè.

L'ha dicis anche Marco Panèlla,  
l'ha 'na testa ch'l'è pès 'd n'oficina  
a l'ha fin facc vutè Ciciolina  
e csè dèss sùma tùcc bèj a post.

'n atr afàri che tùcc j na pàrlu  
e Giuàn e Tamlèn e Rodolfo,  
l'è la gron-na d'la crisi del Golfo  
perchè j spàru e j màsu 'd la gent.

U nost Papa, che sonta persòn-na!  
tût er mond l'è per lû 'na famija  
e lû 'l va e pò ùj mùstra la via  
ch' l'è 'na via 'd giustissia e d'amùr.

Cùj davsèn o luntòn, l'è medèsim,  
l'è semp prònt a viagè tonti ùri,  
l'è dispòst a vulè e a cùri  
per purtè ra giustissia e ra pàs.

L'ha facc l'ani Mariàno, u nost Papa  
nent 'n afè ch'u sa s-ciamma Mariano  
cmè Lisònder, Pidrèn o Adriàno,  
l'è in anàda ch'l'è tûta speciàl.

per jûtèmi a preghè ra Madòna  
per jûtèmi a pensè a Maria  
ch'l'è la mama per noi del Mesìa  
e l'è cùla ch'am jûta a 'ndè 'n Cièl.

Noi pastùr suma 'ndacc, ina vota,  
ant 'na nocc a truvè u siùr Mesìa:  
'l fàva frigg, ma Gisèp e Maria  
j'èru là e im mustràvu 'l Bambèn.

A l'è stacc in afàri magnific,  
e l'è cul che sta sira a rifùma  
spiciè dònca 'n mumènt ch'a cmensùma  
e cmensònda av presènt i pastùr.